

四庫全書

子部

欽定四庫全書

子部

御纂醫宗金鑑卷三十二

詳校官太醫院醫士趙正池

編修臣倉聖脈覆勘

總校官中書臣朱鈐

校對官助教臣胡子襄

謄錄監生臣任兆炯

欽定四庫全書

御纂醫宗金鑑卷三十二

刪補名醫方論卷七目錄

大承氣湯

小承氣湯

調胃承氣湯

更衣丸

麻仁丸

桃仁承氣湯

抵當湯丸

梔子豉湯

梔子豉加甘草湯

梔子豉加生薑湯

梔子厚朴湯

梔子乾薑湯

瓜蒂散

小陷胸湯

大陷胸湯丸

三物白散

大黃黃連瀉心湯

附子瀉心湯

甘草瀉心湯

生薑瀉心湯

半夏瀉心湯

旋覆代赭石湯

麻黃連軀赤小豆湯

梔子檉皮湯

茵陳蒿湯

御纂醫宗金鑑卷三十二目錄

欽定四庫全書

御纂醫宗金鑑卷三十二

刪補名醫方論卷七

大承氣湯

治陽明病潮熱手足濇然汗出譫語汗出多胃燥獨
語如見鬼狀喘冒不能臥腹滿痛脈滑實又目中不
了了睛不和又少陰病初得之口燥咽乾者自利清
水色純青心下痛口燥舌乾者六七日腹脹不大便

者

大黃

四兩
酒洗

厚朴

半觔

枳實

五枚
炙

芒消

三合

右四味以水一斗先煮二物取五升內大黃煮取
二升去滓內芒消再上火微煮一二沸分溫再服
得下卽停後服

小承氣湯

大黃

四兩

厚朴

二兩
炙
去皮

枳實 三枚

右三味以水四升煮取一升二合去滓分溫三服
初服湯當大便不爾再服以利為度得便即止服

集註柯琴曰諸病皆因於氣穢物之不去由於氣之不

順也故攻積之劑必用氣分之藥因以承氣名湯
方分大小者有二義焉厚朴倍大黃是氣藥為君
名大承氣大黃倍厚朴是氣藥為臣名小承氣味
多性猛制大其服欲令大泄下也因名曰大味寡

性緩制小其服欲微和胃氣也因名曰小且煎法更有妙義大承氣用水一斗煮枳朴取五升去滓內大黃再煮取二升內芒消何哉蓋生者氣銳而先行熟者氣純而和緩仲景欲使芒消先化燥屎大黃繼通地道而後枳朴除其痞滿若小承氣以三味同煎不分次第同一大黃而煎法不同此可見仲景微和之意也

喻昌曰金匱治瘕為病胸滿口噤臥不着席脚攣

急必齧齒可與大承氣湯乃死中求生之法也靈
樞謂熱而痙者死腰折痙痙齒齧也茲所云臥不
着席卽腰折之變文脚攣急卽痙痙之變文且齧
齒加以胸滿口禁上中下三焦熱邪充斥死不旋
踵矣在傷寒證腹滿可下胸滿則不可下然投是
湯者須知所謂胸滿謂其邪尚在表故不可下此
證入裏之熱極深極重匪可比倫况陽熱深極陰
血立至消亡卽小小下之尚不足以勝其陽救其

陰故取此湯以承領其一綫之陰氣陰氣不盡為陽熱所劫因而得生者多矣可與二字甚活臨證酌而用之初非定法也既有下之重傷其陰之大戒復有下之急救其陰之活法學者欲為深造端在此矣

調胃承氣湯

治表解有汗裏熱不除胃因不和而不作解者

大黃

四兩
酒洗

甘草

二兩
炙

芒消

半觔

右三味以水三升先煮二味取一升去滓內芒消
微煮令沸少少溫服之

註

三承氣湯之立名而曰大者制大其服欲急下其
邪也小者制小其服欲緩下其邪也曰調胃者則

有調和承順胃氣之義非若大小專攻下也經曰
熱淫於內治以鹹寒火淫於內治以苦寒君大黃
之苦寒臣芒消之鹹寒二味並舉攻熱瀉火之力
備矣更佐甘草之緩調停於大黃芒消之間又少
少溫服之使其力不峻則不能速下而和也

更衣丸

治津液不足腸胃乾燥大便不通

硃砂

五錢研
如飛麵

蘆薈

七錢研
細生用

滴好酒少許和丸每服一錢二分好酒下

集註柯琴曰胃為後天之本不及固病太過亦病然太

過復有陽盛陰虛之別焉兩陽合明而胃家實仲

景製三承氣湯以下之三陽燥結而津液亡前賢

又製更衣丸以潤之古人入廁必更衣故以此命

名也硃砂以汞為體性寒重墜下達蘆薈以液為質味苦膏潤下滋兼以大寒大苦之性味能潤燥結從上導下而胃關開矣合以為丸兩者相須得效最宏奏功甚捷誠匪夷所思矣

麻仁丸 又名脾約丸

治腸胃燥熱大便秘結小便數多

麻子 二升

芍藥 半觔

枳實 半觔

大黃 一觔
去皮

厚朴 一觔
去皮

杏仁 一升
去皮
煎熬碾脂

右六味為末煉蜜為丸桐子大飲服十九日三服

漸加以利為度

集註成無己曰約者約結之約又約束也經曰飲入於

胃游溢精氣上輸於脾脾氣散精上歸於肺通調水道下輸膀胱水精四布五經并行今胃強脾弱約束津液不得四布但輸膀胱小便數而大便鞭故曰脾約麻仁甘平而潤杏仁甘溫而潤經曰脾欲緩急食甘以緩之本草曰潤可去燥是以麻仁為君杏仁為臣枳實破結厚朴瀉滿故以為佐芍藥調中大黃通下故以為使

朱震亨曰既云脾約血枯火燔津竭理宜滋陰降

火津液自生何秘之有此方惟熱甚而稟實者可
用熱微而虛者愈致燥涸之苦矣

--	--	--	--	--	--	--	--

桃仁承氣湯

治血結胸中手不可近或中焦畜血寒熱胸滿漱水
不欲嚥善忘昏迷如狂者此方治敗血留經通月事

桃仁

五十個
去皮尖

桂枝

三兩

大黃

四兩

芒硝

二兩

甘草

二兩

右五味以水七升煮取二升半去滓內芒消更上
火微沸下火先食溫服五合日三服當微利

抵當湯並丸

治傷寒畜血併治癥瘕追蟲攻毒甚佳

水蛭

三十個
熬

蟲蟲

三十個
去頭足
熬

大黃

三兩

桃仁

三十個
去皮尖

右四味為散以水五升煮三升去滓溫服一升不

下再服利為度

水蛭

二十個
熬

蟲蟲

二十五個
熬去翅

桃仁

二十個
去皮尖

大黃

三兩

右四味杵分為四九以水一升煮一九取七合服
晬時當下血若不下更服

集註

柯琴曰膀胱為水府血本無所容畜者也少腹者

膀胱之室也熱結鞭滿當小便不利而反利者是
病不在膀胱內而在少腹內也可知其隨經之滯
血因瘀熱而結於少腹之裏而非膀胱之裏也故
小便雖利而鞭滿急結畜血仍瘀於少腹也熱淫
於內神魂不安故發狂血瘀不行則滯不運故衄

微而沉滯不運則氣不宣故沉而結也滯氣不周於身則身黃消穀善饑者胃火熾盛也大便秘反易者血之濡也色黑者畜血滲入也善忘者血不榮智不明也此皆瘀血之徵兆非至峻之劑不足以抵其巢穴而當此重任故立抵當湯蛭蟲之善飲血者而利於水蝨蟲之善吮血者而猛於陸並取水陸之善取血者以攻之同氣相求更佐桃仁之苦甘推陳致新大黃之苦寒蕩滌邪熱故名抵當

也若熱雖盛而未狂少腹滿而未鞭宜小其制為丸以緩治之若外證已解少腹急結其人如狂是轉屬陽明用調胃承氣加桃仁桂枝之行血者於其中以微利之胃和則愈矣此桃仁承氣為治之緩也

欽定四庫全書



卷三十二

梔子豉湯

附加減諸湯

治陽明病脈浮而緊咽燥口苦腹滿而喘發熱汗出不惡寒反惡熱身重煩躁心中憤憤怵惕懊憹目疼鼻乾不得臥

梔子

十四枚擘

香豉

四合綿裹

右二味以水四升先煮梔子得二升半內豉煮取一升半去滓分二服溫進一服得吐止後服

若少氣者加甘草二兩

若嘔者加生薑三兩

若下後心煩腹滿起臥不安者去香豉加厚朴四兩枳實四枚

若醫以丸藥下之身熱不去心中結痛去香豉加乾薑二兩

若身熱發黃者去香豉加甘草一兩黃蘗二兩

集註柯琴曰太陽以心腹為裏陽明以心腹為表蓋陽

明之裏是胃實不特發熱惡熱目痛鼻乾汗出身

重謂之表一切虛煩虛熱咽燥口苦舌胎腹滿煩躁不得臥消渴而小便不利凡在胃之外者悉是陽明之表也仲景製汗劑是開太陽表邪之出路製吐劑是引陽明表邪之出路所以太陽之表宜汗不宜吐陽明之表當吐不當汗太陽當汗而反吐之便見自汗出不惡寒饑不能食朝食暮吐欲食冷食不欲近衣等證此太陽轉屬陽明之表法當梔子豉湯吐之陽明當吐而不吐反行汗下溫

鍼等法以致心中憤憤怵惕懊懷煩躁舌胎等證
然仍在陽明之表仍當梔子豉湯主之梔子苦能
涌泄寒能勝熱其形象心又赤色通心故主治心
中上下一切證豆形象腎又黑色入腎製而為豉
輕浮上行能使心腹之濁邪上出於口一吐而心
腹得舒表裏之煩熱悉解矣所以然者急除胃外
之熱不致胃家之實卽此梔豉湯為陽明解表之
聖劑矣熱傷氣者少氣加甘草以益氣虛熱相搏

者多嘔加生薑以散邪若下後而心腹滿起臥不安是熱已入胃便不當吐故去香豉屎未燥鞭不宜復下故祇用梔子以除煩佐枳朴以泄滿此兩解心腹之妙又小承氣之輕劑也若以丸藥下之身熱不去知表未解也心中結痛知寒留於中也表熱裏寒故任梔子之苦以除熱倍乾薑之辛以逐寒而表熱自解裏寒自除然非吐不能達表故用此以探吐之此又寒熱並用為和中解表之劑

矣內外熱熾肌肉發黃必須苦甘之劑以調之藥
皮甘草色黃而潤助梔子以除內煩而解外熱形
色之病仍假形色以通之此皆用梔豉加減以禦
陽明表證之變幻也夫梔子之性能屈曲下行不
是上涌之劑惟豉之腐氣上蒸心肺能令人吐耳
觀瓜蒂散必用豉汁和服是吐在豉而不在梔也
梔子乾薑湯去豉用薑是取其橫開梔子厚朴湯
以枳朴易豉是取其下泄似皆不欲上越之義雖

苦亦能作涌然非探吐不能吐也病人舊微澹者
不可與則梔子之性自明矣

瓜蒂散

治胸中痞鞭痰飲一切實邪及氣衝咽不得息者用
此吐之

瓜蒂

一分
熬黃

赤小豆

一分

右二味各別搗篩為散已合治之取一錢匕以香
豉一合熱湯七合煮作稀糜去滓取汁和散溫頓
服之不吐者少少加服得快吐乃止

註
胸中者清陽之府諸邪入胸皆阻陽氣不得宣達

以致胸滿痞鞭熱氣上衝燥渴心煩噎噎欲吐脈
數促者熱鬱結也胸滿痞鞭氣上衝咽喉不得息
手足寒冷欲吐不能吐脈遲緊者寒鬱結也凡胸
中寒熱與氣與飲鬱結為病諒非汗下之法所能
治必得酸苦湧瀉之品因而越之上焦得通陽氣
得復痞鞭可消胸中可和也瓜蒂極苦赤豆味酸
相須相益能除胸胃中實邪為吐劑中第一品也
而佐香豉粥汁合服者藉穀氣以保胃氣也服之

不吐少少加服得快吐而即止者恐傷胃中元氣也此方秦功之捷勝於汗下所以三法鼎立今人不知岐伯仲景之精義置之不用可勝惜哉

小陷胸湯

治心下痞按之則痛脈浮滑者

黃連 一兩

半夏 半升

栝蒌實

一個
大者

右三味以水六升先煮栝蒌實取三升去滓內諸藥煮取二升分溫三服

集註程知曰此熱結未深者在心下不似大結胸之高

在心上按之痛比手不可近為輕脈之浮滑又緩

於沉緊但痰飲素盛挾熱邪而內結所以脈見浮滑也以半夏之辛散之黃連之苦瀉之栝蒌之苦潤滌之皆所以除熱散結於胸中也先煮栝蒌分溫三服皆以緩治上之法

程應旄曰黃連滌熱半夏導飲栝蒌潤燥合之以開結氣亦名曰陷胸者攻雖不峻而一皆直瀉其胸裏之實邪亦從此奪矣

大陷胸湯丸

主治傷寒發熱不發汗而反下之表熱乘虛入於胸中與不得為汗之水氣結而不散令心下至少腹鞭滿而痛不可近其人身無大熱但頭汗出或潮熱燥渴脈沉緊者如水腫腸澼初起形氣俱實者亦可用

大黃 六兩

芒消

苦葶塵子

杏仁 各半斤
去皮

甘遂

一錢
為末

右五味以水先煮大黃杏麩去滓內芒消煮一二沸內甘遂末溫服得快利止後服如未劇者加白蜜二合作丸如彈子大水煮一九服過宿乃下如不下更服

集註柯琴曰胸中者宗氣之所出故名氣海氣為陽故屬太陽之部氣為水母氣清則水精四布氣熱則水濁而壅結矣水結於胸則津液不下無以潤腸胃故大便必燥不下輸膀胱故水道不通大黃芒

消善滌腸胃之熱實此病在胸中而亦用以為君者熱淫於內當治以苦寒且以潤陽明之燥是實則瀉子之法補膀胱之寒亦制之以其所畏也任甘遂之苦辛所以直攻其水結然水結因於氣結必佐杏仁之苦溫以開其水中之氣氣行而水自利矣水結又因於氣熱必佐葶藶之大寒以清其氣分之熱源清而流自潔矣若胸中水結而未及中焦者當小其制而復以白蜜之甘以緩之使留

戀於胸中過宿乃下但解胸心之結滯而保腸胃
之無傷是又以攻劑為和劑也是方為利水攻積
之劑故治水腫痢疾之初起者甚捷然必視其人
壯實可以一戰成功如平昔素虛弱與病久而不
任攻伐者當念虛虛之戒矣

三物白散方

治傷寒寒實結胸無熱證者及胸膈寒實痰水內結等證

桔梗 三分

貝母 三分

巴豆

一分去皮熬
黑研如泥

右杵二味為末內巴豆於臼中杵之以白飲合服
強人一錢羸者減之病在膈上必吐在膈下必利
不利進熱粥一盃利過不止進冷粥一盃

註

是方治寒實痰水結胸極峻之藥也君以巴豆極辛極烈攻寒逐水斬關奪門所到之處無不破也佐以貝母開胸之結使以桔梗為之舟楫載巴豆搜逐胸邪膈上者必吐膈下者必利使其邪悉盡無餘矣然惟知任毒以攻邪不量強羸鮮能善其後也故羸者減之不利進熱粥利過進冷粥蓋巴豆性熱得熱則行得冷則止不用水而用粥者藉穀氣以保胃也

大黃黃連瀉心湯

治傷寒表解心下痞按之不軟其脈關上浮者

大黃 二兩

黃連 一兩

右二味以麻沸湯二升漬之須臾絞去滓分溫再服

註 痞鞭虛邪而用大黃黃連能不起後人之疑耶仲

景使人疑處正是妙處蓋因後人未嘗細玩不得其法皆煎而服之大悖其旨矣觀乎用氣薄之麻

沸湯漬大黃黃連須臾去滓僅得其無形之氣不
重其有形之味是取其氣味俱薄不大瀉下雖曰
攻痞而攻之之妙義無窮也

附子瀉心湯

治傷寒表解心下痞惡寒汗出者

大黃 二兩

黃連 一兩

黃芩 一兩

附子 一枚炮去皮別煮汁

右四味切三味以麻沸湯二升漬之須臾絞去滓
內附子汁分溫再服

註

心下鞭痛結胸也鞭而不痛心下痞也惡寒而復
汗出非表不解乃表陽虛也故以大黃黃連黃芩

瀉痞之熱附子溫表之陽合內外而治之其妙在
以麻沸湯漬三黃須臾絞去滓內別煮附子汁義
在瀉痞之意輕扶陽之意重也

甘草瀉心湯

治傷寒中風醫反下之其人下利日數十行穀不化
腹中雷鳴心下痞鞭而滿乾嘔心煩不得安醫見心
下痞謂病不盡復下之其痞益甚此非結熱但以胃
中虛客氣上逆故使鞭也

甘草 四兩

黃芩 三兩

黃連 一兩

乾薑 三兩

半夏 半升

大棗 十二枚

右六味以水一斗煮取六升去滓再煎取三升溫服一升日三服

註
毋論傷寒中風表未解總不可下醫反下之因而成痞其人下利日數十行水穀不化腹中雷鳴者誤下胃中空虛也心下痞鞭而滿乾嘔心煩不得安者乘虛客邪上逆也醫見心下痞鞭謂下之不盡又復下之其痞益甚但此非結熱之痞亦非寒結之痞乃乘胃空虛客氣上逆陽陷陰凝之痞也

方以甘草命名者取和緩之意用甘草大棗之甘
溫補中緩急治痞之益甚半夏之辛破客逆之上
從苓連瀉陽陷之痞熱乾薑散陰凝之痞寒緩急
破逆瀉痞寒熱備乎其治矣

生薑瀉心湯

治傷寒汗出解後胃中不和心下痞鞭乾噫食臭脇下有水氣腹中雷鳴下利者

甘草

二兩炙

人參

三兩

乾薑

一兩

半夏

半升洗

黃芩

三兩

黃連

一兩

生薑

四兩切

大棗

十二枚擘

右八味以水一斗煮取六升去滓再煎取三升溫

服一升日三服

註傷寒汗出之後餘邪轉屬陽明心下痞滿鞭痛不大便者此其人胃素燥熱因而成實攻之可也今其人平素胃虛兼脇下有水氣卽不誤下餘熱乘虛入裏結成痞鞭不痛胃虛不能消化水穀則乾噫食臭也胃中寒熱不和則腹中雷鳴下利也名生薑瀉心湯者其義重在散水氣之痞也生薑半夏散脇下之水氣人參大棗補中州之土虛乾薑

甘草以溫裏寒黃芩黃連以瀉痞熱備乎虛水寒熱之治胃中不和下利之痞未有不愈者也

半夏瀉心湯

治傷寒五六日嘔而發熱柴胡證具而以他藥下之
但滿不痛心下痞者

半夏

半升
洗

黃芩

三兩

乾薑

三兩

人參

三兩

黃連

一兩

甘草

三兩
炙

大棗

十二枚
擘

右七味以水一斗煮取六升去滓再煎取三升溫

服一升日三服

集註

王又原曰傷寒五六日柴胡證具而以他藥下之成痞即用小柴胡湯以乾薑易生薑以黃連易柴胡彼以和表裏此以徹上下而必推半夏為君者痞從嘔得來半夏之辛以破結而止嘔也

旋覆代赭石湯

治汗吐下解之後心下痞鞭噫氣不除

旋覆花 三兩

人參 二兩

代赭石 一兩

半夏 半升
洗

生薑 五兩
切

甘草 三兩
炙

大棗 十二枚
擘

右七味以水一斗煮取六升去滓再煎取三升溫

服一升日三服

集註

羅謙輔曰汗吐下解後邪雖去而胃氣已虧矣胃氣既虧三焦因之失職清無所歸而不升濁無所納而不降是以邪氣留滯伏飲為逆故心下痞鞭噫氣不除方中以人參甘草養正補虛薑棗和脾養胃所以安定中州者至矣更以代赭石之重使之斂浮鎮逆旋覆花之辛用以宣氣滌飲佐人參以歸氣於下佐半夏以蠲飲於上濁降痞鞭可消清升噫氣自除觀仲景治少陰水氣上凌用真武

湯鎮之治下焦滑脫不守用赤石脂禹餘糧固之
此胃虛氣失升降復用此法理之則胸中轉否為
泰其為歸元固下之法各極其妙如此

麻黃連軀赤小豆湯

治傷寒表不解痰熱在裏發黃者

麻黃 二兩

赤小豆 一升

杏仁

四十枚
去皮尖

生薑

一斤
切

大棗

十二枚
擘

甘草

一斤
炙

生梓白皮 一升

連軀 二兩

以上八味以潦水一斗先煮麻黃再沸去上沫內

諸藥煮取三升分溫三服半日則盡

註

濕熱發黃無表裏證熱盛者清之小便不利者利之裏實者下之表實者汗之皆無非為病求去路也用麻黃湯以開其表使黃從外而散去桂枝者避其濕熱也佐薑棗者和其榮衛也加連軫梓皮以瀉其熱赤小豆以利其濕同成表實發黃之效也連軫即連翹根無梓皮以茵陳代之成無已曰煎以潦水者取其味薄不助濕熱也

梔子蘘皮湯

治傷寒身黃發熱無表裏證者

梔子

十五枚

甘草

一兩

黃蘘

一兩

右三味以水四升煮取一升半去滓分溫再服

註傷寒身黃發熱者若有無汗之表以麻黃連軋赤

小豆湯汗之若有成實之裏以茵陳蒿湯下之今

外無可汗表證內無可下裏證惟有黃熱宜以梔

子藥皮湯清之可也此方之甘草當是茵陳傳寫
之誤也

茵陳蒿湯

陽明病發熱但頭汗出身無汗小便不利渴飲水漿
此為瘀熱在裏身必發黃腹微滿者本方主之

茵陳蒿

六兩

梔子

十四枚

大黃

二兩

右三味以水二斗先煮茵陳減六升內二味煮取
三升去滓分溫三服小便當利如皂角汁狀色正
赤一宿腹減黃從小便去也

集註

柯琴曰太陽陽明俱有發黃證但頭汗出而身無汗則熱不外越小便不利則熱不下泄故瘥熱在裏然裏有不同肌肉是太陽之裏當汗而發之故用麻黃連翹赤小豆湯為涼散法心胸是太陽陽明之裏當寒以勝之用梔子蘘皮湯乃清火法腸胃是陽明之裏當瀉之於內故立本方是逐穢法茵陳稟北方之氣經冬不凋傲霜凌雪偏受大寒之氣故能除熱邪留結率梔子以通水源大黃以

調胃實令一身內外痲熱悉從小便而出腹滿自
減腸胃無傷乃合引而竭之之法此陽明利水之
聖劑也又曰仲景治陽明渴飲有四法本太陽轉
屬者五苓散微發汗以散水氣大煩燥渴小便自
利者白虎加參清火而生津脈浮發熱小便不利
者豬苓湯滋陰而利水小便不利腹滿者茵陳蒿
湯以泄滿令黃從小便出病情治法胸有成竹矣
每思仲景利小便必用氣化之品通大便必用承

氣之品故小便不利者必加茯苓甚者兼用豬苓
因二苓為氣化之品而小便由於氣化也茲小便
不利不用二苓者何本論云陽明病汗出多而渴
者不可與豬苓湯以汗多胃中燥豬苓湯復利小
便故也斯知陽明病汗出多而渴者不可用則汗
不出而渴者津液先虛更不可用明矣此以推陳
致新之茵陳佐以屈曲下行之梔子不用枳朴以
承氣與芒消之峻利則大黃但可以潤胃燥而大

便之不遽行可知故必一宿而腹始減黃從小便
去而不由大腸去仲景立法神奇匪夷所思耳



御纂醫宗金鑑卷三十二

欽定四庫全書

子部

御纂醫宗金鑑卷三十三

詳校官太醫院醫士臣趙正池

編修臣倉聖脈覆勘

總校官中書臣朱 鈐

校對官助教臣胡子襄

謄錄監生臣顧重光

欽定四庫全書

御纂醫宗金鑑卷三十三

刪補名醫方論卷八目錄

小柴胡湯

大柴胡湯

柴胡桂枝湯

黃芩湯

黃連湯

黃連阿膠湯

理中湯丸

乾薑附子湯

茯苓四逆湯

附子湯

四逆湯

通脈四逆湯

白通湯

白通加豬膽汁湯

真武湯

當歸四逆湯

當歸四逆加吳茱萸生薑湯

吳茱萸湯

烏梅丸

赤石脂禹餘糧湯

白頭翁湯

御纂醫宗金鑑卷三十三目錄

欽定四庫全書

御纂醫宗金鑑卷三十三

刪補名醫方論卷八

小柴胡湯

治傷寒五六日寒熱往來胸脇苦滿嘿嘿不欲飲食
心煩喜嘔口苦耳聾脈弦數者此是少陽經半表半
裏之證宜此湯以和解之

柴胡

半斤

黃芩

三兩

人參 三兩

半夏 半升

甘草 三兩

生薑 三兩

大棗 十二

枚 擘

右七味以水一斗二升煮取六升去滓再煎取三升溫服一升日三服

若胸中煩而不嘔去半夏人參加栝蒌實

若渴者去半夏加人參栝蒌根

若腹中痛去黃芩加芍藥

若脇下痞鞭去大棗加牡蠣

若心下悸小便不利者去黃芩加茯苓

若不渴外有微熱者去人參加桂枝溫覆取微似汗愈

若欬者去人參大棗生薑加五味子乾薑

集註程應旂曰方以小柴胡名者取配乎少陽之義也

至於制方之旨及加減法則所云上焦得通津液得下胃氣因和盡之矣何則少陽脈循脇肋在腹

陽背陰兩歧間在表之邪欲入裏為裏氣所拒故
寒往而熱來表裏相拒而留於歧分故胸脇苦滿
神識以拒而昏困故嘿嘿木受邪則妨土故不欲
食膽為陽木而居清道為邪所鬱火無從泄逼炎
心分故心煩清氣鬱而濁則成痰滯故喜嘔嘔則
木火兩舒故喜之也此則少陽定有之證其餘或
之云者以少陽在人身為遊部凡表裏經絡之辨
皆能隨其虛而見之不定之邪也據證俱是太陽

經中所有者特以五六日上見故屬之少陽半表
半裏兼而有之方是小柴胡證方中以柴胡疏木
使半表之邪得從外宣黃芩清火使半裏之邪得
從內徹半夏豁痰飲降裏氣之逆人參補久虛助
生發之氣甘草佐柴芩調和內外薑棗佐參夏通
達榮衛相須相濟使邪無內向而外解也至若煩
而不嘔者火成燥實而逼胸故去人參半夏加枳
實也渴者燥已耗液而逼肺故去半夏加桔萎

根也腹中痛木氣散入土中胃陽受困故去黃芩
以安上加芍藥以戢木也脇下痞鞭者邪既留則
木氣實故去大棗之甘而泥加牡蠣之鹹而奠也
心下悸小便不利者水邪侵乎心矣故去黃芩之
苦而伐加茯苓之淡而滲也不渴身有微熱者半
表之寒尚滯於肌故去人參加桂枝以解之也欬
者半表之寒湊入於肺故去參棗加五味子易生
薑為乾薑以溫之雖肺寒不減黃芩恐乾薑助熱

也總之邪在少陽是表寒裏熱兩鬱不得升之故
小柴胡之治所謂升降浮沉則順之也

大柴胡湯

治熱結在內心下急嘔不止鬱鬱微煩柴胡證仍在者與大柴胡湯下之

柴胡

半劬

黃芩

三兩

半夏

半升

芍藥

三兩

枳實

四枚

大黃

二兩

生薑

五兩

大棗

十二枚擘

右八味以水一斗二升煮取六升去滓再煎溫服

一升日三服

註

柴胡證在又復有裏熱故立少陽兩解法也以小柴胡湯加枳實芍藥者仍解其外以和其內也去參草者以裏不虛少加大黃以瀉結熱倍生薑者因嘔不止也斯方也柴胡得生薑之倍解半表之功枳芍得大黃之少攻半裏之効徐雖云下之亦下中之和劑也

柴胡桂枝湯

傷寒六七日發熱微惡寒肢節煩疼微嘔心下支結
此太陽少陽併病也柴胡桂枝湯主之

柴胡

四兩

桂枝

一兩

人參

一兩

甘草

一兩

半夏

二合

黃芩

一兩

芍藥

一兩

大棗

六枚

生薑

一兩

右九味以水七升煮取三升去滓分溫服

集註柯琴曰仲景書中最重柴桂二方以桂枝解太陽

肌表又可以調諸經之肌表小柴胡解少陽半表亦可以和三陽之半表故於六經病外獨有桂枝證柴胡證之稱見二方之任重不拘於經也如陽浮陰弱條是仲景自為桂枝證之註釋血弱氣虛條亦仲景自為柴胡證之註釋桂枝有壞病柴胡亦有壞病桂枝有疑似證柴胡亦有疑似證病如

桂枝證而實非若脚攣急與胸中痞鞭者是已病
如柴胡證而實非本渴而飲水嘔食穀嘔與但欲
嘔胸中痛微溼者是已此條為傷寒六七日正寒
熱當退之時反見發熱惡寒諸表證更見心下支
結諸裏證表裏不解法當表裏雙解之然惡寒微
發熱亦微可知肢節煩疼則一身骨節不疼可知
微嘔心下亦微結故謂之支結表證雖不去而已
輕裏證雖已見而未甚故取桂枝之半以散太陽

未盡之邪取柴胡之半以解少陽微結之證口不
渴身有微熱者法當去人參以六七日來邪雖未
解而正已虛故仍用之外證雖在而病機已見於
裏故方以柴胡冠桂枝之上為雙解兩陽之輕劑
也

黃芩湯

治太陽少陽合病自下利者若嘔者加半夏生薑

黃芩

甘草

芍藥

各三兩

大棗

十二枚擘

右四味以水一斗煮取三升去滓溫服一升日再服夜一服

嘔者加半夏半升生薑三兩

集註程應旂曰此之合病者頭痛胸滿口苦咽乾目眩

或往來寒熱或脈大而弦半表之邪不待太陽傳
遞而即合少陽裏氣失守所以下利陽熱漸盛所
以上嘔故用黃芩湯清熱益陰半裏清而半表自
解矣

柯琴曰太陽少陽合病是熱邪已入少陽之裏膽
火下攻於脾故自下利上逆於胃故兼嘔也與黃
芩湯酸苦相濟調中以存陰也熱不在半表故不
用柴胡今熱已入半裏故黃芩主之雖非胃實亦

非胃虛故不須人參以補中兼嘔者故仍加半夏
生薑以降逆也

黃連湯

治傷寒胸中有熱胃中有邪氣腹中痛欲嘔吐者

黃連 三兩

乾薑 三兩

甘草 三兩

人參 二兩

桂枝 三兩

半夏 半升

大棗 十二枚

右七味以水一斗煮取六升去滓溫服一升日三

服夜二服

集注

程應旄曰熱在胸中有煩躁鬱悶之證可知胃中反有邪氣以寒邪被格在下故也此證寒熱俱有較之大青龍之寒熱已向近裏一層故其證不見之表裏際而祇見之上下際腹中痛者陰邪在胃而寒乃獨治於下也欲嘔吐者陽邪在胸而熱乃獨治於上也此為上下相格治法亦寒熱並施而辛寒易以苦寒辛熱加以苦熱更以人參半夏以補宣中氣升降陰陽自此條而互及瀉心諸湯皆

其法也

成無己曰濕家下後舌上如胎者以丹田有熱胸
中有寒是邪氣入裏而為下熱上寒也此傷寒傳
裏而為下寒上熱也

喻昌曰陰陽悖逆皆當和解法

黃連阿膠湯

治少陰病得之二三日以上心中煩不得卧

黃連

四兩

黃芩

一兩

芍藥

二兩

雞子黃

二枚

阿膠

三兩

右五味以水五升先煮三物取二升去滓內膠烱盡小冷內雞子黃攪令相得溫服七合日三服

集註柯琴曰此少陰病之瀉心湯也凡瀉心必藉連芩

而導引有陰陽之別病在三陽胃中不和而心下痞鞭者虛則加參甘補之實則加大黃下之病在少陰而心中煩不得卧者既不得用參甘以助陽亦不得用大黃以傷胃矣用苓連以直折心火用阿膠以補腎陰雞子黃佐苓連於瀉心中補心血芍藥佐阿膠於補陰中斂陰氣斯則心腎交合水升火降是以扶陰瀉陽之方變而為滋陰和陽之劑也是則少陰之火各歸其部心中之煩不得卧

可除矣經曰陰平陽秘精神乃治斯方之謂歟

理中湯丸

治中氣不運腹中不實口失滋味病久不食藏府不
調與傷寒直中太陰自利不渴寒多而嘔等證

人參

三兩

白朮

三兩

甘草

三兩

乾薑

三兩

右四味搗篩為末蜜丸如雞子黃大以沸湯數合
和一丸研碎溫服之日三四枚夜二枚腹中未熱
益至三四丸然不及湯湯法以四物依兩數切用

水八升煮取三升去滓溫服一升日三服

若臍上築者腎氣動也去朮加桂四兩

多吐者去朮加生薑三兩

下多者還用朮

悸者加茯苓二兩

渴欲得水者加朮足前成四兩半

腹中痛者加人參足前成四兩半

寒者加乾薑足前成四兩半

腹滿者去朮加附子一枚服湯後如食頃飲熱粥
一升許微自溫勿發衣被

集註

程應旂曰陽之動始於溫溫氣得而穀精運穀氣
升而中氣贍故名曰理中實以變理之功予中焦
之陽也若胃陽虛則中氣失宰膈中無發宣之用
六府無灑陳之功猶如釜薪失焰故下致清穀上
失滋味五藏凌奪諸證所由來也參朮炙草所以
守中州乾薑辛以溫中必假之以焰釜薪而騰陽

氣是以穀入於陰長氣於陽上輸華蓋下攝州都
五藏六府皆以受氣此理中之旨也若水寒互勝
即當脾腎雙溫加以附子則命門益土母溫矣白
朮補脾得人參則壅氣故臍下動氣吐多腹滿者
去朮也加桂以伐腎邪加生薑以止嘔也加附子
以消陰也下多者濕勝也還用朮燥濕也渴欲飲
水飲渴也加朮使飲化津生也心下悸停水也加
茯苓導水也腹中痛倍人參虛痛也寒者加乾薑

寒甚也

乾薑附子湯

下後復發汗晝日煩躁不得眠夜而安靜不嘔不渴
無表證脈沉微身無大熱者乾薑附子湯主之

乾薑 一兩

附子 一枚去皮生用破八片

右二味以水三升煮取一升去滓頓服

茯苓四逆湯

傷寒厥而心下悸發汗若下之病仍不解煩躁者茯苓四逆湯主之

茯苓

六兩

人參

一兩

甘草

一兩
炙

乾薑

一兩

附子

一枚生用
破八片

右五味以水五升煮取三升去滓溫服七合日三

服

註

凡太陽病治不如法汗後復下或下後復汗誤而
又誤變成壞病若其人陽盛而從熱化則轉屬三
陽陽衰而從寒化則繫在三陰此二湯所治之煩

躁皆壞病也煩躁雖六經俱有而多見於太陽少
陰者太陽為真陰之標少陰為真陽之本也未經
汗下而煩躁多屬陽其脈實大其證渴熱是煩為
陽盛躁為陰虛已經汗下而煩躁多屬陰其脈沈
微其證汗厥是煩為陽虛躁為陰極也夫先下後
汗於法為逆外無大熱內不渴嘔似乎陰陽自和
而實妄汗亡陽所以虛陽擾亂於陽分故晝日煩
躁不得眠感陰偏安於陰分故夜而安靜脈沉微

是真陽將脫而煩躁也用乾薑附子壯陽以配陰
薑附者陽中陽也生用則力更銳不加甘草則勢
更猛是方比四逆為峻救其相離故當急也先汗
後下於法雖順若病不解厥悸仍然驟增晝夜煩
躁似乎陰盛格陽而實腎上凌心皆因水不安其
位挾陰邪而上乘是陽虛有水氣之煩躁也用茯苓
苓君四逆抑陰以伐水人參佐四逆生氣而益陽
參苓君子也兼調以甘草比四逆為緩陰陽不急

故當緩也一去甘草一加參苓而緩急自別仲景
用方之妙如此

欽定四庫全書

卷三十三

附子湯

治少陰病身痛手足寒骨節痛口中和背惡寒脈沉者

附子

二枚生用去皮破八片

茯苓 三兩

人參

二兩

白朮 四兩

芍藥

三兩

右五味以水八升煮取三升去滓溫服一升日三服

註少陰為寒水之藏故傷寒之重者多入少陰所以少陰一經最多死證方中君附子二枚者取其力之銳且以重其任也生用者一以壯少火之陽一以散中外之寒則惡寒自止身痛自除手足自溫矣所以固生氣之原令五藏六府有本十二經脈有根脈自不沉骨節可知矣更佐白朮以培土芍藥以平木茯苓以伐水水伐火自旺旺則陰翳消木平土益安安則水有制制則生化此萬全之術

其畏而不敢用束手待斃者曷可勝計耶

欽定四庫全書

卷三十三

四逆湯

治脈沉厥逆等證

甘草

二兩
炙

乾薑

一兩
半

附子

一枚生用去
皮破八片

右三味以水三升煮取一升二合去滓分溫再服
強人可大附子一枚乾薑三兩

註

方名四逆者主治少陰中外皆寒四肢厥逆也君
以炙草之甘溫溫養陽氣臣以薑附之辛溫助陽

勝寒甘草得薑附鼓腎陽溫中寒有水中煖土之
功薑附得甘草通關節走四肢有逐陰回陽之力
腎陽鼓寒陰消則陽氣外達而鯀升手足溫矣

通脈四逆湯

治少陰下利清穀裏寒外熱手足厥逆脈微欲絕身
反不惡寒其人面赤色或腹痛或乾嘔或咽痛或利
止脈不出者厥陰下利清穀裏寒外熱汗出而厥者
主之

乾薑

三兩強人
可四兩

甘草

二兩
炙

附子

大者一枚
生用去皮

右三味以水三升煮取一升二合去滓分溫再服

其脈即出者愈

面色赤者加葱九莖

腹中痛者去蔥加芍藥二兩

嘔者加生薑二兩

咽痛去芍藥加桔梗一兩

利止脈不出者加人參二兩

註論中扶陽抑陰之劑中寒陽微不能外達主以四逆中外俱寒陽氣虛甚主以附子陰盛於下格陽

於上主以白通陰盛於內格陽於外主以通脈是則可知四逆運行陽氣者也附子溫補陽氣者也白通宣通上下之陽氣者也通脈通達內外之陽氣者也今脈微欲絕裏寒外熱是腎中陰盛格陽於外故主之也倍乾薑加甘草佐附子易名通脈四逆湯者以其能大壯元陽主持中外共招外熱反之於內蓋此時生氣已離亡在俄頃若以柔緩之甘草為君豈能疾呼外陽耶故易以乾薑然必

加甘草與乾薑等分者恐渙漫之餘薑附之猛不能安養元氣所謂有制之師也若面赤者加蔥以通格上之陽腹痛者加芍藥以和在裏之陰嘔逆者加生薑以止嘔咽痛者加桔梗以利咽利止齟不出氣少者俱倍人參以生元氣而復脈也

白通湯

治少陰病下利脈微者與白通湯利不止厥逆無脈
乾嘔煩者白通加豬膽汁湯主之服湯脈暴出者死
脈微續者生

葱白

四莖

乾薑

一兩

附子

一枚生用去
皮破八片

右三味以水三升煮取一升去滓分溫再服

白通加豬膽汁湯

葱白

四莖

乾薑

一兩

附子

一枚生用去皮破八片

人尿

五合

豬膽汁

一合

已上三味以水三升煮取一升去滓內豬膽汁人尿和令相得分溫再服若無膽汁亦可

註

是方也即四逆湯減甘草加葱白也而名之曰白通者以葱白能通陽氣也減甘草者因其緩也加尿膽者從其類也下咽之後冷體既消熱性便發

性且不違而致大益則二氣之拒格可調上下之
陰陽可通矣



真武湯

治少陰水氣為患腹痛下利四肢沉重疼痛小便不利其人或咳或嘔或小便利而下利者用此加減

白朮 二兩

茯苓 二兩

白芍 二兩

大附子 一枚
炮

生薑 三兩
切

右五味以水八升煮取三升去滓溫服七合日三

服

若咳者加五味子半升細辛乾薑各一兩

若小便利者去茯苓

若下利去芍藥加乾薑二兩

若嘔去附子加生薑足成半觔

註

小青龍湯治表不解有水氣中外皆寒實之病也

真武湯治表已解有水氣中外皆寒虛之病也真

武者北方司水之神也以此名湯者藉以鎮水之

義也夫人一身制水者脾也主水者腎也腎為胃

關聚水而從其類倘腎中無陽則脾之樞機雖運而腎之關門不開水即欲行以無主制故泛溢妄行而有是證也用附子之辛熱壯腎之元陽則水有所主矣白朮之苦燥建立中土則水有所制矣生薑之辛散佐附子以補陽於主水中寓散水之意茯苓之淡滲佐白朮以健土於制水中寓利水之道焉而尤妙在芍藥之酸收仲景之旨微矣蓋人之身陽根於陰若徒以辛熱補陽不少佐以酸

收之品恐真陽飛越矣用芍藥者是亟收陽氣歸
根於陰也於此推之則可知誤服青龍致發汗亡
陽者所以於補陽藥中之必需芍藥也然下利減
芍藥者以其陽不外散也加乾薑者以其溫中勝
寒也水寒傷肺則咳加細辛乾薑者散水寒也加
五味子者收肺氣也小便利者去茯苓以其雖寒
而水不能停也嘔者去附子倍生薑以其病非下
焦水停於胃也所以不須溫腎以行水祇當溫胃

以散水且生薑功能止嘔也

當歸四逆湯

手足厥冷脈細欲絕者主之若其人內有久寒加吳茱萸生薑

當歸 三兩

桂枝 三兩

芍藥 三兩

細辛 二兩

通草 二兩

甘草 二兩
炙

大棗 二十五
枚擘

右七味以水八升煮取三升去滓溫服一升日三

服

當歸四逆加吳茱萸生薑湯

於前湯內加吳茱萸半觔生薑三兩

右九味以水六升清酒六升和煮取五升去滓分
溫五服

註凡厥陰病則脈微而厥以厥陰為三陰之盡陰盡
陽生若受其邪則陰陽之氣不相順接故脈微而
厥也然厥陰之藏相火遊行其間經雖受寒而藏

不即寒故先厥者後必發熱所以傷寒初起見其
手足厥冷脈細欲絕者不得遽認為虛寒而用薑
附也此方取桂枝湯君以當歸者厥陰主肝為血
室也佐細辛味極辛能達三陰外溫經而內溫藏
通草其性極通善開關節內通竅而外通榮倍加
大棗即建中加飴用甘之法減去生薑恐辛過甚
而迅散也肝之志苦急肝之神欲散甘辛並舉則
志遂而神悅未有厥陰神志遂悅而脈微不出手

足不溫者也不須參苓之補不用薑附之峻此厥陰厥逆與太少不同治也若其人內有久寒非辛溫之品所能兼治則加吳茱萸生薑之辛熱更用酒煎佐細辛直通厥陰之藏迅散內外之寒是又救厥陰內外兩傷於寒之法也

吳茱萸湯

治厥陰病乾嘔吐涎沫頭痛者少陰證吐利手足厥冷煩躁欲死者陽明食穀欲嘔者

吳茱萸 一升

人參 三兩

生薑 六兩

大棗 十二枚擘

右四味以水七升煮取二升溫服七合日三服

集註羅謙輔曰仲景救陽諸法於少陰四逆湯必用薑

附通竅四逆湯倍加乾薑其附子生用附子湯又

加生附至二枚所以然者或壯微陽使之外達或
招飛陽使之內返此皆少陰真陽失所故以回陽
為亟也至其治厥陰則易以吳茱萸而併去前湯
諸藥獨用人參薑棗者蓋人身厥陰肝木雖為兩
陰交盡而一陽之真氣實起其中此之生氣一虛
則三陰濁氣直逼中上不惟本經諸證悉具將陽
明之健運失職以至少陰之真陽浮露而吐利厥
逆煩躁欲死食穀欲嘔種種叢生矣吳茱萸得東

方震氣辛苦大熱能達木鬱直入厥陰降其盛陰
之濁氣使陰翳全消用以為君人參秉沖和之氣
甘溫大補能接天真挽回性命升其垂絕之生氣
令陽光普照用以為臣佐薑棗和胃而行四末斯
則震坤合德木土不害一陽之妙用成而三焦之
間無非生生之氣矣諸證有不退者乎蓋仲景之
法於少陰則重固元陽於厥陰則重護生氣學者
當深思而得之矣

欽定四庫全書

卷三十三

烏梅丸

治厥陰病消渴氣上撞心中疼熱饑而不欲食食
即吐虵又主久痢

烏梅

三百箇

細辛

六兩

乾薑

十兩

黃連

一觔

當歸

四兩

附子

六兩

蜀椒

四兩
去汗

桂枝

六兩

人參

六兩

黃蘗

六兩

右十味異搗篩合治之以苦酒浸烏梅一宿去核蒸之五升米下飯熟搗成泥和藥令相得內臼中與蜜杵二千下丸如梧桐子大先食飲服十九日三稍加至二十九禁生冷滑物臭食等

集註柯琴曰六陰惟厥陰為難治其本陰其標熱其體

木其用火必伏其所主而先其所因或收或散或逆或從隨所利而行之調其中氣使之和平是治厥陰法也厥陰當兩陰交盡又名陰之絕陽宜無

熱矣第其具合晦朔之理陰之初盡即陽之初生所以厥陰病熱是少陽使然也火王則水虧故消渴氣上撞心中疼熱氣有餘便是火也木勝則尅土故饑不欲食蟲為風化饑則胃中空虛虵聞食臭出故吐虵也仲景立方皆以甘辛苦味為君不用酸收之品而此用之者以厥陰主肝木耳洪範曰木曰曲直作酸內經曰木生酸酸入肝君烏梅之大酸是伏其所生也配黃連瀉心而除疼佐

黃蘗滋腎以除渴先其所因也連蘗治厥陰陽邪則有餘不足以治陰邪也椒附辛薑大辛之品並舉不但治厥陰陰邪且肝欲散以辛散之也又加桂枝當歸是肝藏血求其所屬也寒熱雜用則氣味不和佐以人參調其中氣以苦酒浸烏梅同氣相求蒸之米下資其穀氣加蜜為丸少與而漸加之緩則治其本也虻昆蟲也生冷之物與濕熱之氣相成故藥亦寒熱互用且胸中煩而吐虻則連

藥是寒因熱用也虻得酸則靜得辛則伏得苦則
下信為治蟲佳劑久痢則虛調其寒熱酸以收之
下痢自止

赤石脂禹餘糧湯

治久利不止大腸虛脫服理中丸而利益甚者

赤石脂

一觔
搗碎

禹餘糧

一觔
搗碎

右二味以水六升煮取二升去滓分溫三服

身

註柯琴曰甘薑參朮可以補中宮元氣之虛而不足

以固下焦脂膏之脫此利在下焦故不得以理中
之劑收功矣然大腸之不固仍責在胃闕門之不
閉仍責在脾二石皆土之精氣所結實胃而瀉腸

急以治下焦之標者實以培中宮之本也要知此
證土虛而火不虛故不宜於薑附若濕甚而虛不
甚復利不止者故又當利小便也

白頭翁湯

治厥陰熱利下重脈沉弦渴欲飲水者

白頭翁 三兩

黃連 三兩

黃蘗 三兩

秦皮 三兩

右四味以水七升煮取三升去滓溫服一升不愈
更服一升

註

三陰俱有下利證自利不渴者屬太陰也自利而
渴者屬少陰也惟厥陰下利屬於寒者厥而不渴

下利清穀屬於熱者消渴下重下利膿血此熱利
下重乃火鬱濕蒸穢氣奔迫廣腸魄門重滯而難
出內經云暴注下迫者是矣君以白頭翁寒而苦
辛臣以秦皮寒而苦瀼寒能勝熱苦能燥濕辛以
散火之鬱瀼以收下重之利也佐黃連清上焦之
火則渴可止使黃蘗瀉下焦之熱則利自除也治
厥陰熱利有二初利用此方以苦燥之以辛散之
以瀼固之是謂以寒治熱之法久利則用烏梅丸

之酸以收火佐以苦寒雜以溫補是謂逆之從之
隨所利而行之調其氣使之平也



御纂醫宗金鑑卷三十三